

洛陽名園記序

山東李文叔記洛陽名園凡十有九處自富鄭公而終於呂文穆其聲名氣焰見於功德者遺芳餘烈足以想像其賢其次世位尊崇與夫財力雄盛者亦足以知其人經營生理之勞又其次僧坊以清淨化度羣品而乃斥餘事種植灌溉奪造化之功與王公大姓相軋夫洛陽帝王東西宅爲天下之中土圭日影得陰陽之和嵩少瀍澗鍾山水之秀名公大人爲冠冕之望天匠地孕爲花卉之奇加以富貴利達優游閒暇之士配造物而相嫵媚爭妍競於鼎新革故

之際館榭池臺風俗之習歲時嬉遊聲詩之播揚園畫之傳寫古今華夏莫比觀文叔之記可以致近世之盛又可以信文叔之言爲不苟且夫識明智審則慮事精而信道篤隨其所見淺深爲近遠小大之應於熙寧變更天下風靡有所謂必不可者大丞相司馬公爲首後十五年無一不如公料者至今明驗大效與始言若合符節文叔方洛陽盛時足迹目力心思之所及亦遠見高覽知今日之禍曰洛陽可以爲天下治亂之候又曰公卿高進于朝放乎一己之私意忘天下之治忽嗚呼可爲知賢哉文叔在元祐官

太學丁建中靖國再用邪朋竄爲黨人女適趙相挺  
之子亦能詩上趙相救其父云何況人間父子情識  
者哀之今記稱潞公年九十而杖履東西按太師丙  
午生正紹聖乙亥歲譴逐嶺表立黨之二年誣謗宣  
仁聖烈廢降昭慈獻聖羣陰已壯芽孽弄權宰相不  
必斥其名後內相王明叟指言紹聖當國之人如操  
舟者當左而右當右而左旁觀者爲之寒心與文叔  
所言放乎一己之私意而忘天下之治忽若相終始  
愚故曰其言真不苟且也噫繁華盛麗過盡一時至  
於荆棘銅駝腥膻伊洛雖宮室苑囿滌池皆盡然一

廢一興循天地無盡藏安得光明盛大復有如洛陽  
衆賢佐中興之業乎季父浮休侍郎詠長安廢興地  
有詩云憶昔開元全盛日漢苑隋宮已黍離覆轍由  
來皆在說今人還起古人悲感而思治世之難遇嘉  
賢者之用心故重言以書其首紹興八年三月望日  
幽國張琰德和序

洛陽名園記

宋 李薦文叔記 沈澹思閱

富鄙公園

洛陽園池多因隋唐之舊獨富鄙公園取爲近關而景物最勝游者自其第東出探春亭登四景堂則一園之景勝可顧覽而得南渡通津橋上方流亭望紫筠堂而還右旋花木中有百餘步走蔭樾亭賞幽臺抵重波軒而止直北走土筠洞自此入大行中凡謂之洞者皆軒竹丈許引流穿之而徑其上橫爲洞一曰土筠縱爲洞三曰水筠曰石筠曰榭筠歷四洞之

北有亭五錯列竹中曰叢玉曰披風曰漪嵐曰夾竹曰兼山稍南有梅臺又南有天光臺臺出竹木之杪遵洞之南而東還有臥雲堂堂與四景堂並南北左右二山背壓通流凡坐此則一園之勝可擁而有也鄙公自還政事歸第一切謝賓客燕息此園幾二十年亭臺花木皆出其目營心匠故逶迤衡直闔爽深密皆曲有奧思

董氏西園

董氏西園亭臺花木不爲行列區處周旋景物歲增月葺所成自南門入有堂相望者三稍西一堂在大

地間逾小橋有高臺一丈西一堂竹環之中有石芙蓉水自其花間湧出開軒窓四面甚敞盛夏燠暑不見畏日清風忽來留而不去幽禽靜鳴各誇得意此山林之景而洛陽城中遂得之於此小路抵池池南有堂面高亭堂雖不宏大而屈曲甚邃游者至此往往相失堂前世所謂迷樓者類也元祐中有留守喜宴集于此

董氏東園

董氏以財雄洛陽元豐中少縣官錢糧盡籍入田宅城中二園因蕪壤不治然其規模尚足稱賞東園北

鄉入門有栝可十圍實小如松實而其香過之有堂可居董氏盛時載歌舞游之醉不可歸則宿此數十日南有敗屋遺址獨流盃寸碧二亭尚完西有大池中爲堂傍之曰舍碧水四面噴瀉池中而陰出之故朝夕如飛瀑而池不溢洛人盛醉者走登其堂輒醒故俗目曰醒酒池

環谿

環谿王開府宅園甚潔華亭者南臨池池左右翼而北過涼榭復匯爲大池周圍如環故云然也榭南有多景樓以南望則嵩高少室龍門太谷層峯翠巘畢

効奇於前榭北有風月臺以北望則隋唐宮闕樓殿  
千門萬戶岩堯璀璨延亘十餘里凡左大沖十餘年  
極力而賦者可瞥目而盡也又西有錦廳秀野臺園  
中樹松檜花木千株皆品別種列除其中爲嵩塢使  
可張幄次各待其盛而賞之涼榭錦廳其下可坐數  
百人宏大壯麗洛中無逾者

劉氏園

劉給事園涼堂高卑制度適愜可人意有知木經者  
見之且云近世建造率務峻立故居者不便而易壞  
唯此堂正與法合西南有臺一區尤工緻方十許丈

地而樓橫堂列廊廡回繚闌楯周接木蒔花承無不  
妍穩洛人目爲劉氏小景今析爲二不能與他園爭  
矣

叢春園

今門下侍郎安公買於尹氏岑寂而喬木森然桐梓  
檜栢皆就行列其大亭有叢春亭高亭有先春亭叢  
春亭出茶蘼架上北可望洛水蓋洛水自西洶湧奔  
激而東天津橋者壘石爲之直力瀉其怒而納之于  
洪下洪下皆大石底與水爭噴薄成霜雪聲聞數十  
里予嘗窮冬月夜登是亭聽洛水聲久之覺清冽侵

人肌骨不可留乃去  
天王院花園子  
洛中花甚多種而獨名牡丹曰花王凡園皆植牡丹  
而獨名此曰花園子蓋無他池亭獨有牡丹數十萬  
本凡城中賴花以生者畢家于此至花時張幙幄列  
市肆管絃其中城中士女絕烟火游之過花時則復  
爲丘墟破垣遺竈相望矣今牡丹歲益滋而姚黃魏  
紫一枝千錢姚黃無賣者

歸仁園

歸仁其坊名也園盡此一坊廣輪皆里餘北有牡丹

芍藥千株中有竹百畝南有桃李彌望唐丞相牛僧  
孺園七里檜其故木也今屬中書李侍郎方勅亭其  
中河南城方五十餘里中多大園池而此爲冠

苗帥園

節度使苗候旣貴欲極天下佳處卜居得河南河南  
園宅又彌最佳處得開寶宰相王溥園遂構之園旣  
古景物皆蒼老復得完力藻飾出之於是存欲憑陵  
諸園之意矣園故有七葉二樹對峙高百尺春夏望  
之如山然今勅堂其北竹萬餘竿皆大滿二三圍踈  
筠琅玕如碧玉椽今勅亭其南東有水自伊水派來

可浮十石舟今鞞亭歷其溪有大松七今引水繞之  
有池宜蓮荷今鞞水軒板出水上對軒有橋亭制度  
甚雄侈然此猶未盡得王丞相故園水東爲直龍圖  
閣趙氏所得亦大鞞第宅園池其間稍北曰郊廓陌  
陌列七丞相之第文潞公程丞相宅傍皆有池亭而  
趙韓王園獨可與諸園列

趙韓王園

趙韓王宅園國初詔將作營治故其經畫制作殆侔  
禁省韓王以太師歸是第百日而薨子孫皆家京師  
罕居之故園池亦以扇鑰爲常高亭大榭花木之淵

藪歲時獨廝養擁彗負畚鍤者於其間而已蓋人之  
於宴閒每自吝惜宜甚於聲名爵位

李氏仁豐園

李衛公有平泉花木記百餘種耳今洛陽良工巧匠  
批紅判白接以它木與造化爭妙故歲歲益奇且廣  
桃李梅杏蓮菊各數十種牡丹芍藥至百餘種而又  
遠方奇卉如紫蘭茉莉瓊花山茶之儔號爲難植獨  
植之洛陽輒與其土產無異故洛中園圃花木有至  
千種者甘露院東李氏園人力甚治而洛中花木無  
不有中有四并迎翠濯纓觀德超然五亭

松島

松栢椈杉檜栝皆美木洛陽獨愛栝而敬松松島數  
百年松也其東南隅雙松尤奇在唐為袁象先園本  
朝屬李文定公丞相今為吳氏園傳三世矣頗葺亭  
榭池沼植竹木其傍南築臺北構堂東北曰道院又  
東有池池前後為亭臨之自東大渠引水注園中清  
泉細流涓涓無不通處在他郡尚無有而洛陽獨以  
其松名

東園

文潞公東園本藥圃地薄東城水漸瀾甚廣汎舟游

者如在江湖間也淵映瀝水二堂宛宛在水中湘  
藥圃二堂間列水石西去其第里餘今潞公官太師  
年九十尚時杖履游之

紫金臺張氏園

自東園竝城而北張氏園亦繞水而富竹木有亭四  
河圖志云黃帝坐玄扈臺郭璞云在洛汭或曰此其  
處也

水北胡氏園

水北胡氏二園相距十許步在邛山之麓瀝水經其  
旁因岸穿二土室深百餘尺堅完如埏埴開軒窓其



前以臨水上水清淺則鳴漱湍瀑則奔駛皆可喜也  
有亭榭花木率在二室之東凡登覽徜徉俯瞰而峭  
絕天授地設不待人力而巧者洛陽獨有此園耳但  
其亭臺之名皆不足載載之且亂實如其臺四望盡  
百餘里而縈伊繚洛乎其間林木蒼蔚烟雲掩映高  
樓曲榭時隱時見使畫工極思不可圖而名之曰玩  
月臺有庵在松檜藤葛之中闕旁牖則臺之所見亦  
畢陳於前避松檜騫藤葛的然與人目相會而名之  
曰學古菴其實皆此類

大字寺園

大字寺園唐白樂天園也樂天云吾有第在履道坊  
五畝之宅十畝之園有水一池有竹千竿是也今張  
氏得其半爲會隱園水竹尚甲洛陽但以其圖攷之  
則某堂有某水某亭有某木其水其木至今猶存而  
曰堂曰亭者無復彷彿矣豈因於天理者可久而成  
於人力者不可恃邪寺中樂天石刻存者尚多

獨樂園

司馬溫公在洛陽自號迂叟謂其園曰獨樂園園卑  
小不可與它園班其曰讀書堂者數十椽屋澆花亭  
者益小弄水種竹軒者尤小曰見山臺者高不過尋

丈曰釣魚菴曰採藥圃者又特結竹杪落蕃蔓草爲  
之爾溫公自爲之序諸亭臺詩頗行於世所以爲人  
欣慕者不在於園耳

湖園

浴人云園圃之勝不能相兼者六務宏大者少幽邃  
人力勝者少蒼古多水泉者艱眺望兼此六者惟湖  
園而已予嘗游之信然在唐爲裴晉公宅園園中有  
湖湖中有堂曰百花洲名蓋舊堂蓋新也湖北之大  
堂曰四井堂名蓋不足勝蓋有餘也其四達而當東  
西之巖者桂堂也截然出於湖之右者迎暉亭也過

橫地披林莽循曲徑而後得者梅臺知止菴也自行  
逕望之超然登之修然者環翠亭也眇眇重邃猶檀  
花卉之盛而前據池亭之勝者翠擿軒也其大畧如  
此若夫百花酣而白晝眩青蘋動而林陰合水靜而  
跳魚鳴木落而羣峯出雖四時不同而景物皆好則  
又其不可殫記者也

呂文穆園

伊洛二水自東南分注河南城中而伊水尤清徹園  
亭喜得之若又當其上流則春復無枯涸之病呂文  
穆園在伊水上流木茂而竹盛有亭三一在池中二

在池外橋跨池上相屬也洛陽又有園池中有一物  
特可勝者如大隱莊梅楊侍郎園流杯師子園師子  
是也梅蓋早梅香甚烈而大說者云自大庾嶺移其  
本至此流杯水雖急不旁觸爲異師子非石也入地  
數十尺或以地攷之蓋武后天樞銷鑠不盡者也舍  
此又有嘉猷會節恭安溪園等皆隋唐宮園雖已犁  
爲良田樹爲桑麻矣然宮殿池沼與夫一時會集之  
盛今遺俗故老猶有識其所在而道其廢興之端者  
游之亦可以觀萬物之無常覽時之倏來而忽逝也  
論曰洛陽處天下之中挾穀渾之阻當秦隴之襟喉

而趙魏之走集蓋四方必爭之地也天下常無事則  
已有事則洛陽先受兵予故嘗曰洛陽之盛衰者天  
下治亂之候也方唐貞觀開元之間公卿貴戚開館  
列第於東都者號千有餘邸及其亂離繼以五季之  
酷其池塘竹樹兵車蹂踐廢而爲丘墟高亭大榭烟  
火焚燎化而爲灰燼與唐其滅而俱亡者無餘處矣  
予故嘗曰園圃之廢興洛陽盛衰之候也且天下之  
治亂候於洛陽之盛衰而知洛陽之盛衰候於園圃  
之廢興而得則名園記之作予豈徒然哉嗚呼公卿  
大夫方進於朝放乎以一己之私自爲而忘天下之

治忽欲退享此樂得乎唐之末路是矣  
洛陽名公卿園林爲天下第一靖康後祝融回祿盡  
取以去矣予得李拾非文叔洛陽名園記讀之至流  
涕文叔出東坡之門其文亦可觀如論天下之治亂  
候於洛陽之盛衰洛陽之盛衰候於園圃之廢興其  
知言哉河南邵博記  
晉王右軍闡城都有漢時講堂秦時城池門屋樓觀  
慨然遠想欲一游目其與周益州帖蓋所致力焉近  
時呂太史有宗少文臥游之語凡昔人紀載人境之  
勝爲一編其奉祀毫社也自以爲譙沛真源恍然在

目視充之太極嵩之崇福華之雲臺皆將臥遊之噫  
嘻孤矢四方之志高人達士之懷古今一也顧南北  
分裂蜀在境內惟遠患不往爾往則至矣毫充嵩華  
視蜀猶爾封也欲往其可得乎然則太史之情其可  
悲也已予近得此記手爲一通與東京記長安河南  
志夢華錄請書並藏而時自覽焉是亦臥遊之意云  
爾永嘉陳瑗伯玉書

洛陽名園記終